


Matayo 26



Bikaba
biṭighaaye
bilo mukaagha
Kighenu kya
Kuusuka Kusaaluw'o
kuhika, Yesu aakidha e
Bbetaniya hambali Lajaalo
oghu aahumbuuye mu bakuuye
aabaagha aakaaye. Niibuwo
Maliya aasiye akwete
cupa esemeeye, elimu
bigita bisasiye kandi biṭembiye
kwonini, aabiseesela Yesu mu
bighele kandi aatandika kumulaghalija
bighele ebi naakoleesija esoke liye. Ti kusasa
kwa bigita ebi kwamalakaka numba egghi yoona.


1

Yuda Esikalyota, omui mu beeghesebuwa baa Yesu
ekumi na babili, aaghenda mu bakulu baa bahongi
kumughobeliyayo. Obu baaghuuye
ebi Yuda oghu aabughiye
baadheedhuwa, kandi
baamulaghiisanija
kumusasula sente. Niibuwo
aatandikiye kubbala
kahanda kaa
kuhaayo Yesu mu
bantu aba.



2

Beeghesebuwa aba baaghenda baakola ngoku Yesu aabalaghiiye. Baateekanija kiihulo kya Kuusuka Kusaaluw'o. Obu baanaliyagha, Yesu aakwata mugaati, aasaba naasiima Luhanga. Aaghubhegha, aaghuha beeghesebuwa be aba, naaghila ati, "Mukwate, muliye, ghuni ni mubili ghwanje."




3

Obu baamaliye kuliya mugaati oghu, aakwata kiikopo kya viini aabaha yo, aaghila ati, "Munuwe eni enuwe boona. Ni saghama yanje ya ndaghaano, eghi ekuseesuwa haabwa bakanije, kughaniluwa bibhi byabo."




4

Yesu aaghila ati, "Simooni, Simooni, ontegheeleliye! Sitaani aasabiye Luhanga kumusii milaniya kubalengesa enuwe boona niikuwo muleke kumpikilija. Bhaatu naabasabiye kukila munu uwe Simooni nti otaleka kumpikilija, nanga bwile bukuhika okukuukilila, bhaatu haanuma ya kuhikilija kwawe oku kutodha kuguma, weekambiisiye baanakyawe kutodha kuba na kuhikilija kugumiye."



5

Peetelo aamughila ati, "Mukama wanje, neeteekanije kughenda mu nkomo kandi kukuwa hamui naawe." Yesu aamughila ati, "Peetelo, obwalo mukilo nkoko atakakookiye okuba nuwaaneehighaane kasatu oti toomanije."




6

Niibuwo Yesu na beeghesebuwa be baagheniye mu kiikalo eki bakughilaghamu Getesemaani. Aabaghila ati, "Musitame hani, muleke ngende hali nsabe." Aasaba ati, "Abba, Tita! Uwe ogubhiye bintu byona. Otajiima nimbona-bona ntiyo, bhaatu kitaba ngoku mbaliye, kibe ngoku obbaliye."



7

Nahabweki Yuda aasa ahikiye kiigambi kya baasilikale na balemji aba bakulu baa bahongi na Bafalisaayo baatumije. Bantu aba baasa bakwete maataala na maatoji hamui na byakulwaniisiya bikanije. Dumbji omui mu beeghesebuwa be aba aabhulayo kihiyi kiye, aajomb'o muheeleliya wa mukulu wa bahongi boona kutui kwabuliyo. Bhaatu Yesu aaghila beeghesebuwa be aba ati, "Dheka! Mutalwana!" Dumbji akwata haa kutui kwa musaasa oghu, kwakilil'o.



8

Abaalindagha Numba ya Luhanga baakwata Yesu baamutwala mu ka ya mukulu wa bahongi boona. Peetelo aaghenda abalabhiye enuma bukee-buke hali hambali haseliy'o.

Obu baakidhiye, bantu baatumika mulilo ghwa kwota hanjaakati ya mukulu wa bahongi boona oghu.


Bantu baasitama, baatandika kwota.

Niibuwo Peetelo naye aasiye aabasitamamu.



9

Omui mu baheeleliya baa mukulu wa bahongi boona, lughanda lwa musaasa oghu Peetelo aajombiy'o kutui, aamubuuliya ati, "Tanuuwe naaboone oli na musaasa oghu mu musili ghwa biti Oljiva?" Peetelo aatodha eehighaana, dumbi bwile bwonini nkoko yaakooka. Dumbi Peetelo aatuwa enja, aatandika kulilila kimui.




10

Baamemba abaabaagha mu lukulato olu boona baamuka, baatwala Yesu ewaa Pilaato oghu akaba alemiye disitulikiyi ya Buyudaaya bwile obu.

Pilaato aabuuliya Yesu ati, "Nuuwe Mukama wa Bayudaaya?"

Yesu aamukuukamu ati, "Ee, ngoku waakabughiyeye."

Pilaato aabalagha kulekela Yesu, niibuwo aatodhiye




11

aaghambila bantu aba ngoku Yesu atali n'eki aasobeeiye.

Bhaatu bantu aba beeyongelela kimui kugola bati, "Bamubambe haa musalaba! Bamubambe!"

Haakumaliilila Pilaato aasiima, aalaghila baasilikale be kubamba Yesu. Niibuwo baasilikale baatwete Yesu. Baaghenda bamuheekeeiyeye musalaba ghuwe. Baamukidhiya mu kiiikalo bakughilaghamu "Kiiikalo kya Kahanga" (eki mu Lulamaiki baaghilaghamu Gologota.)




12

Haala niiyo baamubambiiye hamui na bantu banji babili. Musalaba ghwa omui baaghuumililiya haa luhande lwa buliyo bwa Yesu, na ghwa onji haa luhande lwabumesu, oghwa Yesu baaghuumililiya haagati.



13

Obu bwahikiye saaha mukaagha sya ntangaaji, musana ghwalima, mwelima ghwakwata mu ehanga eli lyona, ghwahikiya saaha mwenda. Bwile obu bwonini, kateni eghi ekaba edhodhookeeyeye mu Numba ya Luhanga yaatemukamu kabili. Yesu aatakila kimui n'elaka lyamaani ati, "Tita, mwoyo ghwanje naaghuta mu mikono yaawe!" Obu aamaliye kubugha atiyoye, dumbi aatwikana.



14

Hakaba aliyo musaasa omui liina liye Yojeefu, alughiyeye mu tauni ya Alimateya. Akaba ali memba wa Lukulato Lukulu lwa bengei kandi bamuhutiye. Musaasa oghu akaba alindiliye bulemi bwa Luhanga.

Obu bwahikiye lwaghola kandi kilo eki niikiyo Bayudaaya beeteekanijagha haabwa kilo kya Sabhato, aaghenda ewaa Pilaato atoobahiye, aamusaba muku ghwa Yesu.


15

Yojeefu oghu aaghula siiti njelu mpyaka, aaghenda aaya muku ghwa Yesu haa musalaba. Aaghuboha mu siiti eghi, aaghutwala, aaghuta mu kituulo eki aali asanguuwe alimiye mu kibaale kiinamulito.

Aahilingitiya ebaale liinamulito, aaliswikila haa munuwa ghwa kituulo eki.

16

Kilo ekyalabhiyo, haanuma ya kilo eki Bayudaaya beeteekanijagha haabwa kilo kya Sabhato, bakulu baa bahongi, na Bafalisaayo baaghenda ewaa Pilaato.




17

Baamughila bati, "Waitu, tukuusuka, munabisubha oghu, obu aabaagha anaakaaye akaghila ati, 'Haanuma ya bilo bisatu nkuhumbiuka.'"



18

Dumbi baat'o balindi kandi baata kaakulolel'o haa ebaale lineeteeye kimui elyabaagha haa mulyango ghwakiyo kwoleka ngoku balindiye kituulo eki.



19

Kilo kya Sabhato eki obu kyahooy'o, kilo Kyasande nkyambisi cui-cui butakakeeye, Maliya Mangadhalina na muunakiye onji oghu naye dhee baaghilaghamu Maliya, baakeelela kughenda haa kituulo.

Hakab'o musiki ghwamaani oghwadingiye nsi, nanga malajika wa Mukama akasunduka kulugha eghulu.

20

Aaghenda haa kituulo aahilingitiya ebaale lineeteeye kimui elyabaagha haa mulyango ghwa kituulo eki kandi aalisitam'o. Abaabaagha balindjiye kituulo eki baakala

kutukumila haabwa kumwobaha kandi baaba nga bantu baakuuye.

21

Obu bakali aba baakidhiye haa kituulo eki, malaika oghu aabaghila ati, "Mutoobaha nanga nimanjiye mukwete kubala Yesu oghu baabambiye haa musalaba. Taali hani, aahumbuukiye ngoku aabughiye. Mwise mulole

hambali baabaagha balangaaiye muku ghuwe."

22

Dumbi bakali aba baalugha haa kituulo haala boobahiye bhaatu badheedheleeuwe kimui. Baaligita kughenda kughambila beeghesebuwa baa Yesu. Bakali aba mbanaligita kulugha haa kituulo, beetulakaka Yesu naabasangaana mu kihanda.

Aabalamukiya ati, "Mpempa!"

Baamwis'o, baamughuwa mu maghulu, baamulamija.

23

Haakumaliilila, beeghesebuwa be ekumi n'omui baamubona mbaliya. Aabasoghosa haabwa kubhenga kuhikilija ebi baanyakabo abaamuboone naahumbuukiye baabaghambiiye. Obu Mukama Yesu aamaliye kughambila beeghesebuwa be aba bintu ebi, aatwaluwa mu eghulu, aasitama haa luhande lwa mukono ghwabuliyo ghwa Luhanga.

24

Kumanya Luhanga naakundiye nsi, akahayo Mwana wee omui enkaha, niikuwo weena oghu akumuhikilija atahwelekelela, bhaatu atunge bwomiji butahuw'o.

54



60

25

Balooma 3:23

Nanga bantu boona bakasija, baalemuwa kuhika haa kitiinisa kya Luhanga.

Balooma 6:23

Nanga mpeela ya kibhi ni luku, bhaatu kitembo eki Luhanga akuheelagha busa, ni bwomiji butahuw'o mu Kilisito Yesu Mukama waatu.

Bahebbulaayo 9:27

Ti ngoku muntu ali na kukuwa mulundi ghumui, kandi haanuma y'eki Luhanga amutwile musango,

Beefeeso 2:8,9

Enuwe mukahikilija mwajunuwa haabwa ngughuma sya Luhanga. Eki tamwakyekoleeye enuwe bonkaha, bhaatu ni kitembo kya Luhanga. Taabaaye kiyo haabwa bikoluwa byanu, nahabweki atab'o muntu n'omui oghu akwepanka.

26

Balooma 10:9,10

Kaakuba waatula na kanywa kaawe oti, “Yesu ni Mukama,”
kandi ohikilija mu mutima ghwawe ngoku Luhanga
aamuhumbuyye mu bakuyye, olijunuwa.

Nanga muntu akaakuhikilijagha aahiye haa mutima,
akubaluwagha kuba ahikiliye, kandi akaakwatulagha na
kanuwa ke, akujunuwagha.

Yohaana 3:16,17

Kumanya Luhanga naakundiye nsi, akahayo Mwana wee
omui enkaha, niikuwo weena oghu akumuhikilija
atahwelekelela, bhaatu atunge bwomiji butahuw’o.
Nanga Luhanga taatumiyeye Mwana wee munsu kughitwila
musango, bhaatu niikuwo nsi egubhe kujunuwa kukwamu
mu Mwana oghu.

27

1 Yohaana 5:11-13

Ti buukajiso niibuwo buni, Luhanga akatuha bwomiji
butahuw’o, kandi bwomiji obu buli mu Mwana wee. Weena
oghu ali na Mwana, ali na bwomiji obu. Bhaatu weena
oghu atali na Mwana oghu, taali na bwomiji obu. Bintu bini
naabihandiikila enuwe abahikilije liina lya Mwana wa
Luhanga, niikuwo mumanye ngoku muli na bwomiji
butahuw’o.

28

Matayo 26-28; Luka 22-24; Yohaana 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Lubwisi, Talinga-Bwisi NT (tlj) © (Active) Wycliffe
Bible Translators, Inc. All rights reserved.

<https://live.bible.is/bible/TLJWBT/MAT/1>

©2026 Bible for Children, Inc.
www.M1914.org www.bibleforchildren.org

29